

---

---

事師法五十頌

拔毗天大阿闍黎造頌

湯薊銘居士譯

頂禮妙音菩薩！

得具貴勝金剛薩埵上位因，上師蓮足如實恭敬為作禮。

清淨續說依止彼，今總集說其敬聽。

已能獲得勝灌頂，如是金剛軌範師，十方所住諸如來，三時現前為作禮。

以最勝信日三時，獻花中圍而合掌，頭頂接足為作禮，開演上師當敬事。

師或在家新出家，為避世間譏毀故，以持禁戒心作禮，面前所置正法等。

若獻座位若起立，作事業等諸敬事，有禁戒者普應作，唯離拜及非妙業。

上師及與其弟子，同等失壞於誓句，勤勇軌範及弟子，最初應互相觀察。

具慧弟子不應從，無有悲潛而忿毒，貢高貪著不守護，自矜而伐為上師。

堅牢調伏具足慧，具忍正直無諂曲，了知咒與續加行，具足悲潛解諸論。

畢竟曉了十真性，善巧繪造中圍業，了知宣說咒加行，其心專一根調伏。

於彼同等怙主想，既為弟子若輕毀，即名輕毀一切佛，是故恆常當得苦。

若有輕毀軌範師，便由疫氣傷害病，鬼魅熾燃或諸毒，增上愚癡而命終。

王法火難或毒蛇，水或空行或盜賊，鬼魅邪弓所殺害，從此墮入那落迦。

普於一切軌範師，何時不應惱觸心，若由愚癡而現行，那落迦中受煎逼。

諸所示現極可怖，若無間等那落迦，一切輕毀軌範者，正說應住於彼處。

是故一切勤勇者，於其金剛軌範師，大慧自善不矜伐，何時不應起輕毀。

諸有恭敬供上師，隨順師故而奉施，從此熾燃等侵害，當來亦令不出生。

於自誓句軌範師，以非可施妻與子，及以自命常承事，況復變動諸財物。

是故無數俱抵劫，極難獲得大覺位，若有具足勤精進，亦於現生能賜予。

恆常守護自誓句，恆常供養諸如來，亦恆奉獻其上師，此與一切佛同等。

欲得無盡真實者，以其少分堪悅意，變成至極殊勝者，若彼若此獻上師，

若能於此恆施供，即是恆施一切佛，此施名為福資糧，資糧令得勝悉地。  
是故弟子應具足，悲舍戒忍諸功德，軌範師與金剛持，不應觀為有別異。  
可畏等同壞塔罪，不應踐踏上師影，況復更所不應踏，若鞋若墊若乘等。  
大覺慧者以歡心，精勤聽受上師命，若如理事無力能，其所不能婉言謝。  
依師當得諸悉地，若增上生若安樂，是故一切精勤者，不應違越上師命。  
上師諸物如自命，上師所愛亦如師，上師眷屬如親屬，依於等住恆思維。  
止憩床座或前行，或作束縛其頂髻，置足於墊手置腰，上師面前皆不應。  
上師安住或起立，不應偃臥或端坐，恆常於彼諸事業，善巧興作令圓滿。  
除遣口唾液沫等，伸展其足於坐墊，往來經行或諍論，上師面前皆不應，  
摩擦支體或舞躍，歌詠伎樂皆不應。加行眾多雜言論，能聞近處不應作。  
鞠躬從座而起立，當大恭敬而端坐，黑夜渡水道可怖，得教令已能前行。  
軌範所能現見前，具慧不應旋扭身，不應以背倚柱等，不應牽曳其指節。  
或濯其足或浴身，拂拭及與撫摩等，皆應先行為作禮，禮已後當隨所喜。  
若當稱說上師名，名後隨行面前文。為令所餘起恭敬，故先稱說勝敬詞。  
若於上師請教令，即應說雲如命行，雙手合掌勿散亂，當善聽受上師教。  
發笑及與唾痰等，當善以手遮其口，作所命事究竟已，當以柔順語啟白。  
師前調順面端坐，善護所著衣等相，以膝著地而合掌，為求聞等三啟白。  
於作敬事一切行，其心應離於我慢，慚羞怖畏善防護，住於初適嫁女相，  
一切輕佻等所作，開演師前應遠離，所餘類此諸所行，自內觀察應遣除。  
善住中圍及護摩，攝收弟子及講說，其處若與師同住，未得許可不應作。  
若開眼等隨所得，一切皆當獻上師，師與所獻取受已，有所餘者隨所喜。  
上師弟子非弟子，弟子亦非上師前，隨行所有諸敬事，及作禮等當摒退。  
隨於軌範有所獻，或軌範師有所賜，具慧於彼應鞠躬，以其二手而持取。  
能以正念無忘失，於自遍行皆精進，同法違越自所行，以歡喜心相勸阻。  
有病恭敬師事業，亦未得師賜許可，於諸遮制雖現行，具善心故不成罪。

---

此中多說何所用，令師歡悅所應作，令師不悅皆遠離，於彼於此當精進。  
悉地隨順軌範師，大金剛持所親說。既曉了已以諸事，一切為令上師悅。  
意樂清淨諸弟子，已正皈依於三寶，隨順上師而轉者，便應施與令記誦。  
此乃施與咒乘等，令得成為正法器，一十有四根本墮，正所應誦及受持。  
如是弟子隨師轉，生無餘利無過患，集此我積無邊善，願諸有情速成佛。